

**КЪЫШ ИБАДЕТ
ЭТКЕН КИМСЕ
ИЧЮН ЭН ГУЗЕЛЬ
ГЪАНИМЕТТИР**



بِسْمِ اللَّهِ الرَّحْمَنِ الرَّحِيمِ

Къыш - ибадет эткен кимсе ичюн эн гузель гъаниметтир.

Эй му'минлер, Аллахтан къоркъунъ! Сон исе, билинъиз, инсан ичюн эн файдалы шейлерден – бу Аллахын аляметлеринден фикир этмек. Чюнки бу шейден фикир этмек, инсаннынъ иманыны зияделештире ве къанийыны къавийлештире. Амма чокъ кимселер бу ибадетни муим тарафыны къачырлар.

Аллахын аляметлеринден ве Онынъ махлюкъларындан тюшюнеркен, инсан озъ Раббисинен олгъан багъны къавийлештире. Аллах бу акъкъында Къуранда дей:

(إِنَّ فِي خَلْقِ السَّمَاوَاتِ وَالْأَرْضِ وَاخْتِلَافِ
اللَّيْلِ وَالنَّهَارِ آيَاتٍ لِأُولِي الْأَلْبَابِ الَّذِينَ
يَذْكُرُونَ اللَّهَ قِيَامًا وَقُعُودًا وَعَلَىٰ جُنُوبِهِمْ
وَيَتَفَكَّرُونَ فِي خَلْقِ السَّمَاوَاتِ وَالْأَرْضِ رَبَّنَا
مَا خَلَقْتَ هَذَا بَاطِلًا سُبْحَانَكَ فَقِنَا عَذَابَ النَّارِ)

«Коклернинъ ве ернинъ яратылувында, гедженен кунъдюзнинъ бири-бири артындан келип-кетювинде, акъылы еринде олгъанлар ичюн, акъыкътен ачыкъ ибретлер бар. Олар аякъта олгъанда, отургъанда, янбашлап яткъанда (эр

вакъыт) Аллахны анъарлар, коклернинъ ве ернинъ яратылувы акъкъында терен-терен тюшюнирлер (ве бойле дерлер:) Раббимиз! Сен буны бошуна яратмадынъ. Сени тесбих этермиз. Бизни джеэннем азабындан къорчала!».

(«аль-Имран», 3:190-191)

Эй Аллахын къуллары! Этрафымызда олып кечкен денишмелер – бу Аллахын эн буюк аляметлериндендир. Бу дуньянынъ турумыны сезмелери: гедже ве кунъдюз бири бирини деништирелер, яз ве къыш, сувукъ ве сыджакъ, кузь ве баарь. Буларнынъ эписинде, Аллахын сонсуз икмети бардыр.

Насыл къыш ве яз кельгенинде, Аллахын озь къулларына къаршы олгъан мерхаметни тюшюн. Къыш яздан сон яваш-яваш келе. Айни ойле язда къыштан сон хемен кельмеден яваш-яваш келе. Эгер бир кереден кельсе эди, о инсанларны вуджудларыны ве этрафтаки тири махлюкъларгъа, осюмликлерге зарар кетирер эди, ве бойледже оларны ёкъ этер эди. Аллахын мерхамети не къадар сонсуз ве буюктир! Сиз бу шейлер устюнден фикир эттинизми, эй Аллахын къуллары?

Къышта, Аллахын корьсеткен чокъ аляметлерини корьмектемиз. Бу эм сувукъ, эмде ягъгъан тынмалар: къар, ягъмур, бурчакъ. Булар акъкъында Аллах «ан-Нур» суресинде бизге хабер эте:

"أَلَمْ تَرَ أَنَّ اللَّهَ يُزْجِي سَحَابًا ثُمَّ يُؤَلِّفُ بَيْنَهُ ثُمَّ
يَجْعَلُهُ رُكَّامًا فَتَرَى الْوَدْقَ يَخْرُجُ مِنْ خِلَالِهِ
وَيُنزَلُ مِنَ السَّمَاءِ مِنْ جِبَالٍ فِيهَا مِنْ بَرَدٍ
فَيُصِيبُ بِهِ مَنْ يَشَاءُ وَيَصْرِفُهُ عَنِ مَنْ يَشَاءُ
يَكَادُ سَنَا بَرْقِهِ يَذْهَبُ بِالْأَبْصَارِ يُقَلِّبُ اللَّهُ اللَّيْلَ
وَالنَّهَارَ ۚ إِنَّ فِي ذَلِكَ لَعِبْرَةً لِّأُولِي الْأَبْصَارِ"

«Кормезсинъми ки, Аллах бир такъым
булутларны (чыкъарып) сюрмекте; сонъра оларны
бир ерге кетирип, усть-устюне топламакъта.
Иште, коръмектесинъ ки, булар арасындан ягъмур
чыкъмакъта. О, коктен, о ердеки дагълардан
(дагълар буюклигинде булутлардан) бурчакъ
эндирир. Артыкъ оны истегенине токъундырыр;
истегенинден де оны узакъ тутар; (бу булутларны)
шемшегининъ парылдысы не ерде исе, козьлерни
алыр! Аллах гедженен кунъдюзни бир-бирине
чевирмекте. Шубесиз, бунда басирет саиплери
ичюн, мытлакъа бир ибрет бар».

(«ан-Нур», 24:43-44)

Эй Аллахын къуллары! Къышта дуйгъанымыз пек
сувукълар, Джехеннемнинъ аязынен багълыдыр.
Айни язда дуйгъанымыз сыджакълар,
Джехеннемнинъ атешини сыджагъынен
багълыдыр. Бу акъкъында эки «сахихте» аль-

Бухари ве Муслимде кельген, Абу Хурейрадан ривает этиле, Пейгъамберимиз ﷺ деди:

اشْتَكَّتِ النَّارُ إِلَى رَبِّهَا فَقَالَتْ: رَبِّ أَكَلَّ بَعْضِي
بَعْضًا، فَأَذِنَ لَهَا بِنَفْسَيْنِ: نَفْسٍ فِي الشِّتَاءِ وَنَفْسٍ
فِي الصَّيْفِ، فَأَشَدُّ مَا تَجِدُونَ مِنَ الْحَرِّ، وَأَشَدُّ
مَا تَجِدُونَ مِنَ الزَّمْهِرِ

«Джехеннем озь Раббисине шикает этти, ве деди:

«Эй Раббим, меним бир парчам экинджи парчамны емекте». О заман Аллах Джехеннемге эки нефес алмагъа изин берди, бириси къышта, экинджси исе язда. Бу нефестен, сиз дуйгъан сыджакъ ве аяз сувукъ келе».

Бу Пейгъамберимизни ﷺ сёзлери, ве биз бу сёзлерге озь къулакъ ве козьлеримизден даан зияде инанамыз. Амма базы джаиллер дейлер, бу сёзлер керчекке къаршы келе. Олар дейлер: مخالف للواقع «Керчекке къаршы келе, чюнки мевсимлерни денишмеси кунеш ве ерни бири бирине къаршы олмасынен багълыдыр».

Бу сёзлерге джевап о къадар къолайки, оларнынъ хабири биле ёкъ – бу хадис, мевсимлерни денишмеси Джехеннемнинъ нефесинен багълымы, аджеба?! Бу хадис мевсимлерни денишмесине эндирильгенми аджеба?! Ве бу

хадисте, язнен къышны олмасы Джехеннемнинъ нефесинен багълымы, аджеба?! Бу акъкъында айтылмагъан.

Терсине, хадисте яз ве къыш эвелден олгъанлары акъкъында ривает этиле. Яни бу хадисте айтылгъанындан эввель, Джехеннемнинъ Аллаха мураджат эткенинден эввель.

Амма хадисте айтыла, аяз сувукънен пек сыджакъ, бу Джехеннемнинъ нефесининъ тесиридик. Амма айтылмагъанки, Дженнемнинъ нефесинден яз ве къыш, яаз ве сыджакъ пейда ола. Бу хадиске диккъатнен бакъсанъыз, эр бир шей тайын ола.

Базылары хадисны ред этелер, дейлер:

«Сыджакъны ве аяз сувукъны себеплери беллидик. Бу кунешни ерге къаршы яда пек якъын олмасынен яда узакълашмасынен багълыдыр».

Ислям алимлери анълаталар, бу хадиснен керчек арасында зиддиет ёкъ.

Шейх Мухаммад ибн Салих аль-Усаймин

(Аллахын рахметинде олсун) бу меселеге гузель джевап берди ве деди: «Аллах Джехеннемге язда ве къышта нефес алмагъа изин берди. Яздаки нефес неге? Сыджакъны къолайлаштырмагъа.

Къыштаки нефес исе, сувукъны

къолайлаштырмагъа. Онынъ ичюн бизим дуйгъан сыджагъымыз Джехеннемнинъ сыджагъындан ола, ве дуйгъан аяз сувугъымыз, Джехеннемнинъ аязындан ола. Чюнки Джхеннемдеде аязнынъ къатлары бар».

Девамында шейх ибн Усаймин дей:
«Бельким бир кимсе айтар: «Амма буны керчекнен бирлештирмеге пек къыйын, сувукънынъ себеби – бу кунешни зениттен четке кетмесинен багълыдыр. Яни кунешнинъ нуры ерге къаршы къыйыш келе, сыджакъкъа бакъкънда». Биз буна бойле джевап берерик – сизинъ айткъанынъыз бу физикий себептир (سبب حسي). Амма даан Шариат, диний себеплери бар, ве олар бу физикий себеплерни артындадыр. Ве Шариат себеплерини тек Аллахын вахийлери иле анъламакъ мумкюн. Ве пек сыджакъны себеби – бу кунеш зените олгъанынен, айна шу заманда Аллах Джехеннемге нефес алмагъа берип, сыджакъ зияделешмесини арасында зиддиет ёкъ. Сувукънен айна ойледир, кунеш зениттен дженюпке тараф чекиле, ве ава сувукълаша, ве айна заманда Аллах Джехеннемге нефес алмагъа изин бере ве аяз даан къаттылаша. Бойледже, эки себеп бир ерге келе, эм Шариат себеплер, олар вахий иле анълашыла эмде физикий себеплер, оларны муджессем иле идракъ этиле. Бу эки себеп бир ерге келгенинде асла сыкъынты ёкъ. Шариат агъыр олгъан кимселер, дейлер: «Ёкъ бу керчекликке къаршы келе, онынъ ичюн биз бунъа инанмаймыз». Ве терсине, диний суаллерде арткачлыкъ япкъан кимселер, дейлер: «Физик себеплер эсас дегиль». Биринджисиде, экинджисиде – хатадыр. Шариатнен керчеклик

арасында зиддиет ёкъ. Амма инсанлар озь джаиллик себебинден сыкъынтыгъа тюшелер». Агъалар, сувукъ ве сыджакънын себеби акъкъында хадис, бизге, шимди къышта Джахеннемни хатырламакъ керекмейми? Къышта дуйгъан сувукълар, бизге Джахеннемни хатырламакъ керекмейми? Биз яз сыджагъыны ве къыш сувугъыны пек агъыр кечирмектемиз. Ойле исе, инсан насыл этип Джахеннемнинъ сувукъ ве сыджагъына даянаджакъ?!

Эй Аллахын къуллары! Биз озь нефслеримизге бу дуньянен багълы олгъан пек чокъ къасеветлер юклеймиз. Бу дунья сыкъынтыларында бизни бу сене яда башкъа сенеде не беклегенинен къасеветленемиз. Фиятлар котериледжек яда тюшеджек, палылашаджакъ яда уджузлашаджакъ, алыш-вериш, тиджарет япмагъа, топракънен огърашмагъа гузель имкян оладжакъ яда ёкъ. Къыш кельмесинден эввель, онъа азырланмакънен къасеветленемиз. Яз кельмесинден эввель, язнен багълы олгъан сыкъынтыларнен къасеветленемиз. Бу токътамагъан къасевет сырасы тек бу яшайышнен багълыдыр, амма биз озь юреклеримизде ахиретнен багълы олгъан къасеветлерге ер къалдырдыкъмы аджеба. Юреклеримизде ахиретни къасевет этмек, онынъ сыкъынтыларына, къыйынлыкъларына ер къалдымы аджеба? Онынъ ичюн Пейгъамберимиз ﷺ бизге бойле дуа огретти:

اللَّهُمَّ لَا تَجْعَلِ الدُّنْيَا أَكْبَرَ هَمِّنَا، وَلَا مَبْلَغَ عِلْمِنَا

«Аллахым, бу дуньяны бизим эн онемли къасеветимиз ве бильгимизни черчивеси япма». ат-Тирмизи, 3502.

Эй Аллахын къуллаары! Къыш кельди ве оннен берабер сувукълар кельди, бай инсанлар хатырлайлармы, шимдики заманда сувукътан ве ачлыкътан къыйналгъан инсанлар бар?! Базылары ичюн сувукъ ер – бу ятакъ, юргъан ерине исе – бу ачыкъ кок олгъаныны козь огюне кетирелерми?!

Зира Пейгъамберимиз ﷺ бойле деди:

انقُوا النَّارَ وَلَوْ بِشِقِّ تَمْرَةٍ

«Ярым хурма себебинден олса биле озюньизни Джахеннем атешинден къорчалангъыз».

аль-Бухари ве Муслим.

Джахеннем атешинден къорчаланмакъ ичюн ярым хурма олса биле бер! Фукъарени ашат, онъа юргъан, яда пальто яда куртка, онъа файда кетиреджек шейни хедие эт – садакъа бер! Эгер санъа Аллах окъадар хайыр насиб этти исе, ондан эн азында бир шей бер! Бу файда кетирмез ве бу пек аз бир шей деп тюшюнме. Сенинъ ичюн бу шей бельким эмиетсиз бир шейдир, амма фукъареге бу онемли олур.

Онынъ ичюн Пейгъамберимиз ﷺ бойле деди:

لَا تَحْقِرَنَّ مِنَ الْمَعْرُوفِ شَيْئاً

«Хайырдан эр бир шейге эмиет беринъиз».
Муслим.

Яни эр бир хайыр амельни яп.

Сувукълар кельмесинен сизге хатылрламакъ истейим, къыш – бу къолай гъаниметтир (сувукъ ве къолай къазанылгъан гъаниметтир (аль-гъанима ль-барида - *الْغَنِيمَةُ الْبَارِدَةُ*)).

Амма бу гъанимет ким ичюн? Бу къолай къазаныладжакъ гъанимет ким ичюн? Аллаха ибадет эткен ве таби олгъан кимселер ичюн. Къышнынъ кунълери къыскъа, геджелери исе узун, онынъ ичюн инсангъа кундюз ораза тутмагъа къолай ве гедже намазларыны къылмакъ къолай.

Онынъ ичюн Умар Ибну аль-Хаттаб (Аллах ондан разы олсун) деди:

الشتاء غنيمة العابدين

«Къыш – бу ибадет эткен кимселер ичюн гъаниметтир».

Абдуллах Ибну Мас'уд (Аллах ондан разы олсун) айта эди:

*مَرْحَبًا بِالشَّتَاءِ تَنْزِلُ فِيهِ الْبَرَكَاتُ وَيَطْوُلُ فِيهِ
الليْلِ لِلْقِيَامِ، وَيَقْصُرُ فِيهِ النَّهَارُ لِلصِّيَامِ*

«Къыш хош кельсин, чюнки къышта берекет эндириле ве намазта турмагъа геджелер узун ола, ораза тутмакъ ичюн кунълер къыскъа ола».

Хасан аль-Басри айта эди:

نِعْمَ زَمَانُ الْمُؤْمِنِ الشِّتَاءُ لَيْلُهُ طَوِيلٌ يَقُومُهُ،
وَنَهَارُهُ قَصِيرٌ يَصُومُهُ

«Му'мин ичюн къыш – не къадар бир гузель вакъыттыр, геджелери узун ве о гедже намазларыны къыла, куню исе къыскъа ве о ораза тута».

Селефлер къышкъа къаршы бойле къуванч дуйгъулары дуя эдилер. Аллах ёлунда оларны къуванч ве фааллик бастыра эди. Аллага якъынлаштыргъан эр бир шейде гъайрет ве тырышма ола эди.

Амма языкъки, бугуньки куньлерде чокъ инсанларны вазиети шойле ки, бу вакъытларда Аллахын фарзларыны ерине кетирмекни къалдыралар. Аллага ибадет этмектен узакълашалар, озь вакъытларыны харам яда мекрух шейлернен огърашалар. Аллах бизлерни ве оларны догъуртсын!

Олар кяинатны Раббиси олгъан Аллахнынъ сынъырларыны бозмагъа къоркъмайлар.

Геджелери олар юкъламайлар, узун геджелерни юкусыз кечирелер, амма ибадет этмек ичюн дегиль, Аллахын гъадабыны кетиреджек шейлер япмакъ ичюн яда юреклернинъ нурыны ёкъ этмекнен Аллахтан узакълашалар.

Аллаха ялварамыз, бизим вазиетимизни ве бутюн мусульманларны вазиетини догъуртсын! Ве бизни

Озюне эн гузель къайтувнен къайтарсын! Юдже
Аллах бизлерни къуртарылыш ёлларынен алып
кетсин! Бизни къаранлыкътан нургъа
чыкъартсын! Аллах бизге кунь ве геджелерни,
айларны, йылларны денишмесинде гузель
хатырлав ве тенби япсын! Бунда бизге насихат ве
огют япсын!

رَبَّنَا لَا تُزِغْ قُلُوبَنَا بَعْدَ إِذْ هَدَيْتَنَا وَهَبْ لَنَا مِنْ
لَدُنْكَ رَحْمَةً إِنَّكَ أَنْتَ الْوَهَّابُ

اللَّهُمَّ إِنَّا نَسْأَلُكَ مِنَ الْخَيْرِ كُلِّهِ: عَاجِلِهِ وَآجِلِهِ،
مَا عَلِمْنَا مِنْهُ وَمَا لَمْ نَعْلَمْ، وَنَعُوذُ بِكَ مِنَ الشَّرِّ
كُلِّهِ عَاجِلِهِ وَآجِلِهِ، مَا عَلِمْنَا مِنْهُ وَمَا لَمْ نَعْلَمْ
رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً
وَقِنَا عَذَابَ النَّارِ

اللَّهُمَّ يَا مُصَرِّفَ الْقُلُوبِ صَرِّفْ قُلُوبَنَا عَلَى
طَاعَتِكَ

اللَّهُمَّ صَلِّ عَلَى مُحَمَّدٍ، وَعَلَى آلِ مُحَمَّدٍ، كَمَا
صَلَّيْتَ عَلَى إِبْرَاهِيمَ، وَعَلَى آلِ إِبْرَاهِيمَ، إِنَّكَ
حَمِيدٌ مَجِيدٌ، وَبَارِكْ عَلَى مُحَمَّدٍ، وَعَلَى آلِ

مُحَمَّدٍ، كَمَا بَارَكْتَ عَلَىٰ إِبْرَاهِيمَ، وَعَلَىٰ آلِ
إِبْرَاهِيمَ، فِي الْعَالَمِينَ إِنَّكَ حَمِيدٌ مَّجِيدٌ
وآخر دعوانا أن الحمد لله رب العالمين

СЛУШАТЬ АУДИО В ТЕЛЕГРАМ

ЧИТАТЬ СТАТЬЮ НА САЙТЕ



بِسْمِ اللَّهِ الرَّحْمَنِ الرَّحِيمِ

Qış - ibadet etken kimse için en güzel ğanimettir. Ey mu'minler, Allahtan qorquñ! Son ise, biliñiz, insan için en faydalı şeylerden – bu Allahın alâmetlerinden fikir etmek. Çünkü bu şeyden fikir etmek, insanın imanını ziyadeleştire ve qaniyını qaviyleştire. Amma çoq kimseler bu ibadetni müim tarafını qaçırılar.

Allahın alâmetlerinden ve Onın mahlûqlarından tüşünerken, insan öz Rabbisinen olğan baĝnı qaviyleştire. Allah bu aqqında Quranda dey:

(إِنَّ فِي خَلْقِ السَّمَاوَاتِ وَالْأَرْضِ وَاخْتِلَافِ
الَّيْلِ وَالنَّهَارِ لآيَاتٍ لِأُولِي الْأَبْصَارِ الَّذِينَ
يَذْكُرُونَ اللَّهَ قِيَامًا وَقُعُودًا وَعَلَىٰ جُنُوبِهِمْ
وَيَتَفَكَّرُونَ فِي خَلْقِ السَّمَاوَاتِ وَالْأَرْضِ رَبَّنَا
مَا خَلَقْتَ هَذَا بَاطِلًا سُبْحَانَكَ فَقِنَا عَذَابَ النَّارِ)

"Köklerniñ ve yerniñ yaratılıvında, gecenen kündüzniñ biri-biri artından kelip-ketüvinde, aqlı yerinde olğanlar için, aqiqaten açıq ibretler bar. Olar ayaqta olĝanda, oturĝanda, yanbaşlap yatqanda (er vaqıt) Allahnı añarlar, köklerniñ ve yerniñ yaratılıvı aqqında teren-teren tüşünirler (ve böyle derler:)

Rabbimiz! Sen bunu boşuna yaratmadıñ. Seni tesbih etermiz. Bizni ceennem azabından qorçala!".

("al-İmran", 3:190-191)

Ey Allahın qulları! Etrafımızda olup keçken denişmeler – bu Allahın en büyük alâmetlerindendir. Bu dunyanıñ turumını sezmeleri: gece ve kündüz biri birini deniştireler, yaz ve qış, suvuq ve sıcaq, küz ve baar. Bularnıñ episinde, Allahın sonsuz ikmeti bardır. Nasıl qış ve yaz kelgeninde, Allahın öz qullarına qarşı olğan merhametni tüşün. Qış yazdan son yavaş-yavaş kele. Ayni öyle yazda qıştan son hemen kelmeden yavaş-yavaş kele. Eger bir kereden kelse edi, o insanlarnı vucudlarnı ve etraftaki tiri mahlüqlarğa, ösümliklerge zarar ketirer edi, ve böylece olarnı yoq eter edi. Allahın merhameti ne qadar sonsuz ve büyüktir! Siz bu şeyler üstünden fikir ettinizmi, ey Allahın qulları?

Qışta, Allahın körsetken çoq alâmetlerini körmektemiz. Bu em suvuq, emde yağğan tınmalar: qar, yağmur, burçaq. Bular aqqında Allah "an-Nur" suresinde bizge haber ete:

"أَلَمْ تَرَ أَنَّ اللَّهَ يُرْزِقُ سَحَابًا ثُمَّ يُؤَلِّفُ بَيْنَهُ ثُمَّ
يَجْعَلُهُ رُكَّامًا فَتَرَى الْوَدْقَ يَخْرُجُ مِنْ خِلَالِهِ
وَيُنزَلُ مِنَ السَّمَاءِ مِنْ جِبَالٍ فِيهَا مِنْ بَرَدٍ
فَيُصِيبُ بِهِ مَنْ يَشَاءُ وَيَصْرِفُهُ عَنِ مَنْ يَشَاءُ

يَكَادُ سَنَا بَرْقِهِ يَذْهَبُ بِالْأَبْصَارِ يُقَلِّبُ اللَّهُ اللَّيْلَ
وَالنَّهَارَ ۚ إِنَّ فِي ذَلِكَ لَعِبْرَةً لِّأُولِي الْأَبْصَارِ "

"Körmezsiñmi ki, Allah bir taqım bulutlarını (çıqarıp) sürmekte; soñra olarnı bir yerge ketirip, üst-üstüne toplamaqta. İşte, körmektesiñ ki, bular arasından yağmur çıqmaqta. O, kökten, o yerdeki dağlardan (dağlar büyükliginde bulutlardan) burçaq endirir. Artıq onı istegenine toqundırır; istegeninden de onı uzaq tutar; (bu bulutlarını) şemşeginiñ parıldısı ne yerde ise, közlerni alır! Allah gecenen künüzni birbirine çevirmekte. Şübesiz, bunda basiret saipleri içün, mıtlaqa bir ibret bar".

("an-Nur", 24:43-44)

Ey Allahın qulları! Qıışta duyğanımız pek suvuqlar, Cehennemniñ ayazinen bağıdır. Ayni yazda duyğanımız sıcaqlar, Cehennemniñ ateşini sıcağinen bağıdır. Bu aqqında eki "sahihte" al-Buhari ve Müslimde kelgen, Abu Hureyradan rivayet etile, Peyğamberimiz ﷺ dedi:

اشْتَكَّتِ النَّارُ إِلَى رَبِّهَا فَقَالَتْ: رَبِّ أَكَلَّ بَعْضِي
بَعْضًا، فَأَذِنَ لَهَا بِنَفْسَيْنِ: نَفْسٍ فِي الشِّتَاءِ وَنَفْسٍ
فِي الصَّيْفِ، فَأَشَدُّ مَا تَجِدُونَ مِنَ الْحَرِّ، وَأَشَدُّ
مَا تَجِدُونَ مِنَ الزَّمْهِرِيرِ

"Cehennem öz Rabbisine şikayet etti, ve dedi: "Ey Rabbim, benim bir parçam ikinci parçamı yemekte". O zaman Allah Cehennemge eki nefes almağa izin berdi, birisi qışta, ekinisi ise yazda. Bu nefesten, siz duyğan sıcaq ve ayaz suvuq kele".

Bu Peyğamberimizni ﷺ sözleri, ve biz bu sözlerge öz qulaq ve közlerimizden daan ziyade inanamız. Amma bazı cailler deyler, bu sözler kerçekke qarşı kele. Olar deyler: مخالف للواقع "Kerçekke qarşı kele, çünki mevsimlerni denişmesi küneş ve yerni biri birine qarşı olmasinen bağıdır".

Bu sözlerge cevap o qadar qolayki, olarnıñ haberi bile yoq – bu hadis, mevsimlerni denişmesi Cehennemniñ nefesinen bağılımı, aceba?! Bu hadis mevsimlerni denişmesine endirilgenmi aceba?! Ve bu hadiste, yaznen qışnı olması Cehennemniñ nefesinen bağılımı, aceba?! Bu aqqında ayılmağan.

Tersine, hadiste yaz ve qış evelden olğanları aqqında rivayet etile. Yani bu hadiste ayılğanından evvel, Cehennemniñ Allaha muracat etkeninden evvel.

Amma hadiste ayıla, ayaz suvuqnen pek sıcaq, bu Cehennemniñ nefesiniñ tesiridir. Amma ayılmağanki, Cennemniñ nefesinden yaz ve qış, yaaz ve sıcaq peyda ola. Bu hadiske dikqatnen baqsañız, er bir şey tayın ola.

Bazıları hadisni red eteler, deyler: "Sıcaqnı ve ayaz suvuqnı sebepleri bellidir. Bu küneşni yerge qarşı yada pek yaqın olmasinen yada uzaqlaşmasinen

bağlıdır". İslâm alimleri añlatalar, bu hadisnen kerçek arasında ziddiyet yoq.

Şeyh Muhammad ibn Salih al-Usaymin (Allahın rahmetinde olsun) bu meselege güzel cevap berdi ve dedi: "Allah Cehennemge yazda ve qışta nefes almağa izin berdi. Yazdaki nefes nege? Sıcaqnı qolaylaştırmağa. Qıştaki nefes ise, suvuqnı qolaylaştırmağa. Onıñ içün bizim duyğan sıcağımız Cehennemniñ sıcağından ola, ve duyğan ayaz suvuğımız, Cehennemniñ ayazından ola. Çünkü Chennemdede ayazniñ qatları bar".

Devamında şeyh ibn Usaymin dey:

"Belkim bir kimse aytar: "Amma bunı kerçeknen birleştirmege pek qıyın, suvuqnıñ sebebi – bu küneşni zenitten çetke ketmesinen bağlıdır. Yani küneşniñ nuru yerge qarşı qıyış kele, sıcaqqa baqqnda". Biz buna böyle cevap bererik – siziñ aytqanıñız bu fizikiy sebeptir (سبب حسي). Amma daan Şariat, diniy sebepleri bar, ve olar bu fizikiy sebeplerni artındadır. Ve Şariat sebeplerini tek Allahın vahiyleri ile añlamaq mümkün. Ve pek sıcaqnı sebebi – bu küneş zenite olğaninen, ayni şu zamanda Allah Cehennemge nefes almağa berip, sıcaq ziyadeleşmesini arasında ziddiyet yoq. Suvuqnen ayni öyledir, küneş zenitten cenüpke taraf çekile, ve ava suvuqlaşa, ve ayni zamanda Allah Cehennemge nefes almağa izin bere ve ayaz daan qattılaşa. Böylece, eki sebep bir yerge kele, em Şariat sebepler, olar vahiy ile añlaşıla emde fizikiy sebepler,

olarını mücessem ile idraq etile. Bu eki sebep bir yerge kelgeninde asla sıqıntı yoq.

Şariat ağır olğan kimseler, deyle: "Yoq bu kerçeklikke qarşı kele, onıñ içün biz buña inanmaymız". Ve tersine, diniy suallerde artqaçlıq yapqan kimseler, deyle: "Fizik sebepler esas degil". Birinciside, ekinciside – hatadır. Şariatnen kerçeklik arasında ziddiyet yoq. Amma insanlar öz caillik sebebinden sıqıntığa tüşeler".

Ağalar, suvuq ve sıcaqnın sebebi aqqında hadis, bizge, şimdi qışta Cehennemni hatırlamaq kerekmeymi? Qışta duyğan suvuqlar, bizge Cehennemni hatırlamaq kerekmeymi? Biz yaz sıcağını ve qış suvuğunu pek ağır keçirmektemiz. Öyle ise, insan nasıl etip Cehennemniñ suvuq ve sıcağına dayanacaq?!

Ey Allahın qulları! Biz öz nefslerimizge bu dunyanen bağı olğan pek çoq qasevetler yükleyemiz. Bu dunya sıqıntılarında bizni bu sene yada başqa senede ne beklegeninen qasevetlenemiz. Fiyatlar köterilecek yada tüşecek, palılaşacaq yada ucuzlaşacaq, alış-veriş, ticaret yapmağa, topraqnen oğraşmağa güzel imkân olacaq yada yoq.

Qış kelmesinden evvel, oña azırlanmaqnen qasevetlenemiz. Yaz kelmesinden evvel, yaznen bağı olğan sıqıntılarnen qasevetlenemiz. Bu toqtamağan qasevet sırası tek bu yaşayışnen bağıdır, amma biz öz yüreklerimizde ahiretnen bağı olğan qasevetlerge yer qaldırdıqmı aceba.

Yüreklerimizde ahiretni qasevet etmek, onıñ sıqıntılarına, qıyınlıqlarına yer qaldımı aceba? Onıñ içün Peyğamberimiz ﷺ bizge böyle dua ögretti:

اللَّهُمَّ لَا تَجْعَلِ الدُّنْيَا أَكْبَرَ هَمِّنَا، وَلَا مَبْلَغَ عِلْمِنَا

"Allahım, bu dunyanı bizim en önemli qasevetimiz ve bilgimizni çerçivesi yapma".

at-Tirmizi, 3502.

Ey Allahın qulları! Qış keldi ve onnen beraber suvuqlar keldi, bay insanlar hatırlaylarmı, şimdiki zamanda suvuqtan ve açıqtan qıynalğan insanlar bar?! Bazıları içün suvuq yer – bu yataq, yurğan yerine ise – bu açıq kök olğanını köz ögüne ketirelirmi?! Zira Peyğamberimiz ﷺ böyle dedi:

اتَّقُوا النَّارَ وَلَوْ بِشِقِّ تَمْرَةٍ

"Yarım hurma sebebinden olsa bile özüñizni Cehennem ateşinden qorçalañız".

al-Buhari ve Müslim.

Cehennem ateşinden qorçalanmaq içün yarım hurma olsa bile ber! Fuqareni aşat, oña yurğan, yada palto yada kurtka, oña fayda ketirecek şeyni hediye et – sadaqa ber! Eger saña Allah oqadar hayır nasib etti ise, ondan en azında bir şey ber! Bu fayda ketirmez ve bu pek az bir şey dep tüşünme. Seniñ içün bu şey belkim emiyetsiz bir şeydir, amma fuqarege bu önemli olur.

Onıñ içün Peyğamberimiz ﷺ böyle dedi:

لا تَحْقِرَنَّ مِنَ الْمَعْرُوفِ شَيْئًا

"Hayırdan er bir şeyge emiyet beriñiz".

Müslim.

Yani er bir hayır amelni yap.

Suvuqlar kelmesinen sizge hatırlamaq isteyim, qış – bu qolay ğanimettir (suvuq ve qolay qazanılğan ğanimettir (al-ğanima l-barida - الغنيمَةُ الْبَارِدَةُ)).

Amma bu ğanimet kim içün? Bu qolay qazanılacaq ğanimet kim içün? Allaha ibadet etken ve tabi olğan kimseler içün. Qışnıñ künleri qısqa, geceleri ise uzun, onıñ içün insanğa kündüz oraza tutmağa qolay ve gece namazlarını qılmaq qolay.

Onıñ içün Umar İbnu al-Hattab (Allah ondan razı olsun) dedi:

الشتاء غنيمة العابدين

"Qış – bu ibadet etken kimseler içün ğanimettir".

Abdullah İbnu Mas'ud (Allah ondan razı olsun) ayta edi:

مَرْحَبًا بِالشَّتَاءِ تَنْزِلُ فِيهِ الْبَرَكَاتُ وَيَطُولُ فِيهِ
الليْلِ لِلْقِيَامِ، وَيَقْصُرُ فِيهِ النَّهَارُ لِلصِّيَامِ

"Qış hoş kelsin, çünkü qışta bereket endirile ve namazta turmağa geceler uzun ola, oraza tutmaq içün künler qısqa ola".

Hasan al-Basri ayta edi:

نِعْمَ زَمَانُ الْمُؤْمِنِ الشِّتَاءُ لَيْلُهُ طَوِيلٌ يَقُومُهُ، وَنَهَارُهُ قَصِيرٌ يَصُومُهُ

"Mu'min için qış – ne qadar bir güzel vaqıttır, geceleri uzun ve o gece namazlarını qıla, künü ise qısqa ve o oraza tuta".

Selefler qışqa qarşı böyle quvanç duyğuları duya ediler. Allah yolunda olarnı quvanç ve faallik bastıra edi. Allaha yaqınlaştırğan er bir şeyde ğayret ve tırışma ola edi.

Amma yazıqki, bugünkü künlerde çoq insanlarnı vaziyeti şöyle ki, bu vaqıtlarda Allahın farzlarını yerine ketirmekni qaldıralar. Allaha ibadet etmekten uzaqlaşalar, öz vaqıtlarını haram yada mekruh şeylennen oğraşalar. Allah bizlerni ve olarnı doğurtsın!

Olar kâinatnı Rabbisi olğan Allahnıñ sınırlarını bozmağa qorqmaylar. Geceleri olar yuqlamaylar, uzun gecelerni yükusız keçireler, amma ibadet etmek için degil, Allahın ğadabını ketirecek şeyler yapmaq için yada yüreklerniñ nurını yoq etmeknen Allahtan uzaqlaşalar.

Allaha yalvaramız, bizim vaziyetimizni ve bütün musulmanlarnı vaziyetini doğurtsın! Ve bizni Özüne en güzel qaytuvnen qaytarsın! Yüce Allah bizlerni qurtarılış yollarinen alıp ketsin! Bizni qaranlıqtan nurğa çıqartsın! Allah bizge kün ve gecelerni, aylarnı, yıllarnı denişmesinde güzel hatırlav ve tenbi yapsın!

Bunda bizge nasihat ve öğüt yapsın!

رَبَّنَا لَا تُزِغْ قُلُوبَنَا بَعْدَ إِذْ هَدَيْتَنَا وَهَبْ لَنَا مِنْ لَدُنْكَ
رَحْمَةً إِنَّكَ أَنْتَ الْوَهَّابُ

اللَّهُمَّ إِنَّا نَسْأَلُكَ مِنَ الْخَيْرِ كُلِّهِ: عَاجِلِهِ وَآجِلِهِ، مَا عَلِمْنَا
مِنْهُ وَمَا لَمْ نَعْلَمْ، وَنَعُوذُ بِكَ مِنَ الشَّرِّ كُلِّهِ عَاجِلِهِ وَآجِلِهِ،
مَا عَلِمْنَا مِنْهُ وَمَا لَمْ نَعْلَمْ

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ
النَّارِ

اللَّهُمَّ يَا مُصَرِّفَ الْقُلُوبِ صَرِّفْ قُلُوبَنَا عَلَى طَاعَتِكَ
اللَّهُمَّ صَلِّ عَلَى مُحَمَّدٍ، وَعَلَى آلِ مُحَمَّدٍ، كَمَا صَلَّيْتَ
عَلَى إِبْرَاهِيمَ، وَعَلَى آلِ إِبْرَاهِيمَ، إِنَّكَ حَمِيدٌ مَجِيدٌ،
وَبَارِكْ عَلَى مُحَمَّدٍ، وَعَلَى آلِ مُحَمَّدٍ، كَمَا بَارَكْتَ عَلَى
إِبْرَاهِيمَ، وَعَلَى آلِ إِبْرَاهِيمَ، فِي الْعَالَمِينَ إِنَّكَ حَمِيدٌ
مَجِيدٌ

وآخر دعوانا أن الحمد لله رب العالمين

СЛУШАТЬ АУДИО В ТЕЛЕГРАМ

ЧИТАТЬ СТАТЬЮ НА САЙТЕ ISLAM.CLICK